

1. प्रधानमंत्री नरेन्द्र मोदी हों कुबैत- कतर ते ओमान दे नेताएं कन्नै गल्लबात कीती ते पच्छमी एशिया च तनोतनी दे बिच्च उंदी संप्रभुता ते क्षेत्रीय अखंडता दे उल्लंघन दी निंदेया कीती।
2. नागरिक उड्डयन मंत्रालय दा आखना ऐ जे पच्छमी एशिया दे हवाई क्षेत्र च तनाव दे मद्देनजर 1200+ भारतीय उड़ाना ते 3800 विदेशी उड़ाना रद्द।
3. रसायन ते खाद्य मंत्री हों बायोफार्मा शक्ति मिशन बारे दस्सेया ते आखेआ जे भारत Biologics च वैश्विक अगुआई करने आस्तै अग्रसर ऐ।
4. पूरा राष्ट्र अज्ज “होली” दा पावन त्योहार मना”रदा ऐ। राष्ट्रपति द्रौपदी मुरमू हों देसै दे लोकें गी होली दी शुभकामनां दितियां न।
5. ते ICC Mens T-20 दे सैमीफाईनल च अज्ज दक्खन अफ्रीका दा मकाबला न्यूजीलैंड कन्नै होग।



### PM- Kuwait

प्रधानमंत्री नरेन्द्र मोदी हों कुबैत दे शहजादे शेख सबाह-अल-खालिद-अल-हमद-अल-मुबारक-अल-सबाह हुंदे कन्नै टेलीफोन राएं गल्ल कीती। श्री मोदी हों इस दरान कुबैत दी संप्रभुता ते क्षेत्रीय अखंडता दे उल्लंघन दी निंदेया कीती। उ'नें आखेआ जे भारत इस कठन घड़ी च कुबैत दे लोकें दे कन्नै ऐ। श्री मोदी हों क्षेत्रीय शांति ते स्थिरता दी बाहली च गल्लबात ते कूटनीति दे महत्व पर जोर दिता। अपने इक सोशल मीडिया पोस्ट च नरेन्द्र मोदी हों कुबैत च भारतीय समुदाय दी सुरक्षा ते कल्याण सुनिश्चित करने आस्तै कुबैती नेतृत्व दे लगातार

समर्थन दी प्रशंसा कीती। प्रधानमंत्री होरें कतर दे आमीर- शेख तमीम बिन हमद अल थानी हुंदे कन्नै गल्लबात च कतर कन्नै दृढ़ एक-जुटता प्रगट कीती। उ'ने कतर दी संप्रभुता ते क्षेत्रीय अखंडता दे कुसै बी उल्लंघन दी कड़ी निंदेया कीती। सोशल मीडिया पोस्ट च श्री मोदी होरें इस चनौतीपूर्ण समें च भारतीय समुदाय लेई कतर दे आमीर दे निरंतर समर्थन लेई आभार व्यक्त कीता। श्री मोदी होरें ओमान दे सुल्तान हैथम बिन तारिक हुंदे कन्नै बी गल्लबात कीती ते पच्छिम एशिया च हाल दे घटनाक्रम पर विचार-विमर्श बी कीता। प्रधानमंत्री मोदी होरें ओमान दी क्षेत्रीय अखंडता दे उल्लंखन दी सख्त शब्दें च निंदेया कीती। दोने नेताएं क्षेत्रीय शांति ते स्थिरता दी तौले बहाली दी कामना कीती। प्रधानमंत्री होरें भारतीय समुदाय दे ओमान च निरंतर समर्थन दे दिक्खभाल दी सराहना कीती।



### **Civil Aviation -Flights**

सिविल हवाबाजी मंत्रालय नै दस्सेया ऐ जे पच्छिमी एशिया दे किश हिस्सें च एयर स्पेस दे बदलदे हालात बश्कार अजे तगर भारतीय जहाजें दियां 1200 शा बद्द ते विदेशी एयरलाइन्स दियां तकरीबन 3800 डोआरियां रद्द करी दिती गेइयां न। इक्क ब्यानै च मंत्रालय नै आखेआ जे ओ हालात पर नेइमी तक्क रख करदा ऐ ते फसें दे लोकें गी लेआने दे टकोहदे इंतजाम कीते जा करदे न। मंत्रालय नै अग्गे दस्सेया जे इंडियन एयरलाइन्स अज्ज 58 डोआरियें दी योजना बना करदी ऐ।



## Tourism- PRASHAD

संस्कृति ते सैलसफा मंत्री गजेन्द्र सिंह शेखावत होंरें आखेआ जे भारत विजन 2047 ते तैहत वैश्विक स्तर पर टिकाऊ ते समुदाय केन्द्रित सैलसफा स्थलें दे निर्माण लेई प्रतिबद्ध ऐ। ITB Berlin-2026 च संयुक्त राष्ट्र सैलसफा मंत्रियें दे शिखर सम्मेलन गी सम्बोधित करदे होई श्री शेखावत होंरें पर्यटन क्षेत्र च जिम्मेदार ते समावेशी विकास लेई भारत दे रोड मैप गी सांझा कीता। उ'नें आखेआ जे प्रधानमंत्री नरेन्द्र मोदी हुंदे नेतृत्व च भारत दी सैलसफा नीति “जिम्मेदारी दे साथ विकास” दे सिद्धांत पर आधारत ऐ। श्री शेखावत होंरें आखेआ जे पिच्छले इक दाहके च सरकार ने देसै दी समृद्ध विरासत ते पारिस्थितिक तंत्रें दी रक्षा करदे होई विश्व स्तरीय बुनियादी ढांचे दे विकास दे माध्यम कन्नै संतुतिल दृष्टिकोण अपनाया ऐ। मंत्री होंरें दस्सेआ जे हवाई अड्डे दी संख्या 74 कोला बधियै 160 कोला मती होई गेई ऐ- जेहदे कन्नै दूरे दे उभरदे सैलसफा थाहरें दी Connectivity च सुधार होआ ऐ- जदकि वंदे भारत एक्सप्रेस जनेही आधुनिक रेल सेवाएं- मुख्य भरै च सैलसफा Circuit गी मजबूत करा'रदियां न। श्री शेखावत होंरें स्वदेश दर्शन ते PRASHAD योजनाएं दे तैहत कीते गेदे रणनीतिक निवेशें पर बी लोs पाई। उ'नें आखेआ जे नेह पैहलकदमियें दा उद्देश्य सैलसफा दे कन्नै-कन्नै मकामी समुदायें गी बी लाहs पजाना ऐ।



## **Nadda- Bio Pharma Shakti**

रसायन ते खाद्य मंत्री जगत प्रकाश नड्डा होरें Bio Pharma शक्ति ते समर्पित रासायनिक पार्क लेई 12 जहार करोड़ रपे दे बजटीय प्रावधान गी देश दे भविष्य लेई रणनीतिक दाव दस्सेया। श्री नड्डा होरें इक वेबिनार गी सम्बोधत करदे होई आखेआ जे मुख बपार समझौते- विकसित भारत गी वैश्विक स्तर पर विस्तार करने दे नमें अवसर प्रधान करोग।



## **Prez -Holi**

राष्ट्रपति द्रौपदी मुर्मू होरें “होली” दे अवसर पर देशवासियें गी शुभकामनां दितियां न। अपने सनेह च उ’नें आखेया जे “होली” आनंद ते उत्सव दा त्योहार ऐ- जेहदा सामाजिक सदभाव दा संदेश दिंदा ऐ। श्रीमति मुर्मू होरें आखेआ जे एह त्योहार समाज च प्रेम ते आशा दा प्रसार करदा ऐ ते कन्नै समाजिक एकता दी भावना गी मजबूत करदा ऐ।



## **LG Greetings -Holi**

लैफ्टिनेंट गवर्नर मनोज सिन्हा होरें बी “होली” दी लोकें गी दिली मुबारकबाद दिती। अपने सनेह च श्री सिन्हा होरें आखेआ जे उर्नेगीं मेद ऐ जे रंगें दा ए त्योहार जेड़ा रिवायती जोश जज्बें कन्नै मनाया जंदा ऐ- सबनें लेई खुशी ते कामयाबी लेइयै औग ते लोकें बश्कार हिरख-प्रेम ते आपसी मेलजोल आहली भावना गी बढ़ावा देग। तौंआई मुखमंत्री उमर अब्दुल्ला होरें भी “होली” दे शुभ

मौके पर जम्मू-कश्मीर दे लोकें गी मबारकबाद दिती ऐ। अपने बधाई सनेह च मुख मंत्री हों “होली” गी इक्क शानदार त्योहार दसेया- जेड़ा इक जुटता खुशी ते आपसी मेलजोल दा प्रतीक ऐ। उंनै मेद जताई ऐ जे रंगें दा त्योहार साम्प्रदायिक मेलजोल गी होर बी निग्गर करोग ते समूलचे क्षेत्र च आपसी भाईचारे दे पक्के बंधन गी होर बी ढूंगगा करोग। मुखमंत्री हों जम्मू-कश्मीर च अमन-रमानदारी- तरक्की- खुशहाली लेई प्रार्थना करदे होई भरोसा जताया जे ए त्योहार सबनै लेई नमियां आसां-मेदां ते खुशी लेईयै औग।

<><><><><><>

### **Janaushadi Saptah 2026**

रसायन ते खाद्य मंत्रालय “जन-औषधी सप्ताह 2026” मना रदा ऐ- जेहड़ी इक देशव्यापी पैहलकदमी ऐ ते जेहदा मकसद सस्ती ते उच्च गुणवत्ता आहली Generic दवाइयें गी बढ़ावा देना ऐ। कल इस अभियान दे त्रीए दिन 47 कैम्पें लाआ गया- जेहदे च हजारें लोकें भाग लैता। इनै कैम्पें च महिलार्यें- बुजुर्गें ते बच्चें लेई सेवाएं पर जोर दिता गेआ। इनै कैम्पें च मुफ्त सलाह-मशवरा ते जनौशधी दवाएं दा व्यापक बंद उपलब्ध करोआया गया। एह पैहलकदमी इस महीने दी 7 तरीक तककर चलोग।

<><><><><><>

### **EAM Conflict**

पच्छिम एशियाई प्रांतें च चला'रदी जंग आहली स्थिति खत्म करने लेई भारत नै तगड़ेआई कन्नै आपसी गल्लबात ते राजनायिक हीलें दा आहवान कीता ऐ।

अपने इक ब्यान च विदेश मंत्रालय दे प्रवक्ता रणधीर जयसवाल होंरें आखेया जे भारत इस संघर्ष गी तौले मकाने लेई बड़े साफ तरीके नै अपनी आवाज़ चुक्का रदा ऐ। उ'नें इस दौरान होए दे नुकसान पर बी बसोस प्रगट कीता। प्रवक्ता होंरें आखेया जे तकरीबन इक करोड़ भारती- खाड़ी दे मुख्यें च रवा'रदे न ते कम्म करा रदे न ते उंदी सुरक्षा ते हिफाजत स्हाड़ी सबनें शा बड्डी प्राथमिकता ऐ।

<><><><><><>

## **Cricket**

ICC Men's T-20 विश्व कप च दक्खन अफ्रीका अज्ज कोलकाता दे इडन गार्डन च पैहले सैमीफाईनल मकाबले च न्यूजीलैंड कन्नै खेड्डोग। मैच भारतीय समें मताबक संजा 7 बजे शुरु होग। दुए सैमीफाईनल मकाबले च भारत दा मकाबला इंग्लैंड कन्नै होग। एह मैच कल मुम्बई दे वानखड़े स्टेडियम च खेड्डेया जाग। दौनें मैचे दे विजेता 8 मार्च गी अहमदाबाद दे नरेन्द्र मोदी स्टेडियम च फाईनल लेई खेड्ढगंन।

<><><><><><>